



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH broj 2/10), Skupština Brčko distrikta BiH na II nastavku 66. redovne sjednice održanom 6. augusta 2020. godine, usvaja

ZAKON
O IZMJENAMA I DOPUNI
ZAKONA O PRAVNIM LICIMA KOJE OSNIVA BRČKO DISTRIKT

Član 1

U Zakonu o pravnim licima koje osniva Brčko distrikt (Službeni glasnik Brčko distrikta BiH, brojevi: 10/2,19/07,2/08 i 3/19) član 10 mijenja se i glasi:

"Član 10

Organi pravnog lica su: upravni odbor i direktor.

Članove upravnog odbora imenuje i razrješava Skupština Brčko distrikta BiH.

Direktora imenuje i razrješava upravni odbor, na način i u postupku propisanom Statutom pravnog lica.

Direktor se imenuje na period od četiri godine, uz mogućnost ponovnog imenovanja, s tim što isto lice ne može biti imenovano više od dva puta uzastopno.

Za direktora može biti imenovano lice koje ima:

- a) državljanstvo Bosne i Hercegovine,
- b) najmanje visoku stručnu spremu,
- c) najmanje pet godina radnog iskustva u struci.

Za direktora ne može biti imenovano lice koje je pravosnažnom sudskom presudom osuđivano za vršenje krivičnih djela i lice protiv kojeg se vodi krivični postupak, osim krivičnih djela iz oblasti saobraćaja.

Pravno lice može imati nadzorni odbor ako je tako određeno Statutom.

Način upravljanja i rukovođenja pravnim licem i unutrašnja organizacija pravnog lica, reguliše se Statutom.

Član 2

Iza člana 10 dodaje se novi član 10a koji glasi:

„Član 10a

Izbor kandidata za članove upravnog odbora pravnog lica vrši Komisija za izbor i imenovanje i mandatno-imunitetska komisija Skupštine Brčko distrikta BiH (u daljem tekstu: Komisija).

Komisija iz stava 1 ovog člana raspisuje konkurs za izbor i imenovanje članova upravnog odbora koji se objavljuje u tri dnevna lista, dostupna na cijeloj teritoriji Bosne i Hercegovine, te zvaničnoj internet stranici Skupštine Brčko distrikta BiH i bit će otvoren petnaest (15) dana od dana objavljivanja javnog konkursa.

Članovi upravnog odbora biraju se na osnovu uslova propisanih članom 12 ovog zakona i profesionalnih sposobnosti, te odražavaju sastav stanovništva Brčko distrikta BiH.

Komisija utvrđuje da li svi kandidati ispunjavaju uslove konkursa, intervjuiše i ocjenjuje kandidate, te utvrđuje rang-listu kandidata koju dostavlja Skupštini Brčko distrikta BiH.

Rok za provođenje postupka izbora članova upravnog odbora i dostavljanje rang-liste Skupštini Brčko distrikta BiH je trideset dana od dana zatvaranja javnog konkursa.

Skupština Brčko distrikta BiH imenuje upravni odbor s rang-liste kandidata koju utvrdi Komisija, u roku od trideset dana od dana dostavljanja iste.

Odluka o imenovanju članova upravnog odbora pravnog lica je konačna i protiv nje se može pokrenuti upravni spor.

Odluka o imenovanju članova upravnog odbora pravnog lica objavljuje se u Službenom glasniku Brčko distrikta Bosne i Hercegovine.

Postupak izbora članova upravnog odbora mora biti okončan prije isteka mandata dotadašnjim članovima upravnog odbora.”

Član 3

Član 12 mijenja se i glasi:

"Član 12

Upravni odbor pravnog lica sastoji se od pet članova.

Upravni odbor se imenuje na period od četiri godine, uz mogućnost ponovnog imenovanja, s tim da isti članovi ne mogu biti imenovani više od dva puta uzastopno.

Članovima upravnog odbora mandat prestaje po sili zakona nakon isteka perioda na koji su imenovani.

U slučaju prestanka članstva u upravnom odboru jednog od članova, mandat novoizabranog člana upravnog odbora traje do isteka mandata svih ostalih članova upravnog odbora.

U upravni odbor mogu biti imenovana najviše tri člana iz reda državnih i javnih službenika zaposlenih u organima javne uprave i institucijama Brčko distrikta BiH.

Članovi upravnog odbora ne mogu biti:

- a) direktori drugih pravnih lica koje osniva Distrikt ili direktori javnih preduzeća,
- b) lica koja su u upravnim odborima drugih pravnih lica koje osniva Distrikt ili su u upravnim odborima javnih preduzeća,
- c) lica koja su pravosnažnom sudskom presudom osuđivana za vršenje krivičnih djela i lica protiv kojih se vodi krivični postupak, osim krivičnih djela iz oblasti saobraćaja,
- d) lica koja imaju manje kvalifikacije i manje radnog iskustva od direktora pravnog lica za koje se bira član upravnog odbora,
- e) lica koja su u radnom odnosu u tom pravnom licu.

Mjesečna naknada za rad člana upravnog odbora utvrđuje se u najvišem iznosu do iznosa jedne prosječne neto plate isplaćene u Brčko distriktu BiH za prethodnu godinu.
Predsjedniku upravnog odbora mjesečna naknada za rad, iz stava 7 ovog člana uvećava se za 20%.“

Član 4

Član 13 mijenja se i glasi:

"Član 13

Nadležnost i način odlučivanja upravnog odbora kao i drugih organa propisuje se Statutom.“

Član 5

U član 14 u stavu 1 riječ "Gradonačelnik", zamjenjuje se riječima „Skupština Brčko distrikta BiH.“

Član 6

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-1006/20
Brčko, 6. 8. 2020. godine

PREDSJEDNIK
SKUPŠTINE BRČKO DISTRIKTA BiH

Esed Kadrić